

化愈遠士氣之日沮無足恠也歟

戊午全羅道救荒教差官李彥憬拜辭傳曰救荒之事詳在事
目盡心措置○繕修都監啓曰康寧殿丕顯閣聽政之所抑戒及
無逸篇依舊書懸且令工曹判書洪暹作景福宮重新記何如傳
曰如啓○咸鏡道安邊德源地震

己未命工曹判書洪暹吏曹判書李浚慶戶曹判書趙士秀往
成均館試二十日未及來製儒生○傳于政院曰今觀乙卯年
曆日則三月無日躔觀象監及知天文文臣問而啓之政院啓
曰乙卯年三月無日躔事問于觀象監及知天文文臣許曄金汝乎於
天文僅識其糟粕云則曰曆法日躔十二次常有於一年之內有閏則十

三月故一月無日躔之次例也或無閏而有一月再入者或一
月全無者每次相距大槩三十餘度而月有大小推移進退故
不定於每月之內也傳曰知道○夜民方南方如火氣月微暈
庚申諫院啓曰近年以來教化陵夷人心漸至澆漓習俗日就
偷薄雖巨家大族淪於污賤而不知愧耻未識厥終之為何如